



BOSNA I HERCEGOVINA
PARLAMENTARNASKUPŠTINA
BOSNE I HERCEGOVINE
PREDSTAVNIČKI DOM

Broj: 01-011-412/01.
Sarajevo, 18. jula 2001.

Z A P I S N I K

sa 12. sjednice Predstavničkog doma Parlamentarne skupštine Bosne i Hercegovine,
održane 18. jula 2001. godine

Dvanaestoj sjednica Predstavničkog doma prisustvovao je 41 poslanik. Odsustvo je opravdao gospodin Halil Mehtić. Sjednica je s radom počela u 11,10 sati.

Kao gosti prisustvovali su: Jozo Križanović, predsjedavajući, Beriz Belkić i Živko Radišić, članovi Predsjedništva Bosne i Hercegovine.

Ispred Vijeća ministara prisustvovali su: Zlatko Lagumdžija, predsjedavajući, Krešimir Zubak, Azra Hadžiahmetović, Dragan Mikerević, Svetozar Mihajlović, ministri u Vijeću ministara, te zamjenici ministara Muharem Imamović, Gordana Ković, Kadrija Haračić - Šabić, Jadranko Prlić i Jusuf Halilagić, Milovan Blagojević i Zora Marjanović.

Sjednici su prisustvovali predstavnici međunarodnih organizacija: Heleen Baakker - politički savjetnik OHR-u, Nina Šandrk predstavnik Odjela za demokratizaciju u OSCE-u, Ssonja Moser - ispred Vijeća Evrope, Emina Ganić, politički savjetnik specijalnog predstavnika generalnog sekretara Vijeća Evrope i Daglas Jonhs - ispred Američke ambasade u BiH.

Kao poseban gost početku sjednice prisustvovao je lord Rassel Johnston, predsjednik Parlamentarne skupštine Vijeća Evrope

Poslije intoniranja Državne himne predsjedavajući dr Sead Avdić je pozdravio prisutne poslanike i goste. Posebno je pozdravio lorda Rassela Johnstona, a potom mu dao riječ da se obrati domu sa kraćim govorom.

Obraćajući se poslanicima gospodin lord Rassel Johnston je, pored ostalog, rekao da je, putujući po Bosni, došao do saznanja da se tu ponovo rađa tolerancija koja je dugo bila karakteristika ovog prostora. "Ali, da bi izgradili državu vama treba više od tolerancije, treba vam kooperacija i saradnja, i to ne oprezna već aktivna saradnja. Treba da izgradite zemlju u kojoj su razlike stvar ponosa", rekao je, pored ostalog lord Rassel. Govoreći o uslovima za prijem BiH u Vijeće Evrope, gospodin Rassel je rekao da je donošenje Izbornog zakona jedini uslov za prijem Bosne i Hercegovine u Vijeće Evrope, što bi značilo pristupanje legalnom i političkom tijelu koje svima nudi jednaku zaštitu. Zato je apelovao na brzo donošenje Izbornog zakona, jer odgađanjem njegovog donošenja odgađa se prijem u Vijeće Evrope, a to bi odgodilo pristup građana BiH sudu u Strazburu, odgodilo bi implementaciju Konvencije o ljudskim pravima i onemogućilo pristup Venecijanskoj komisiji koja je efikasno tijelo koje radi na legalnim ustavnim i zakonskim promjenama. Pozvao je poslanike da učine napor da bi Bosna i Hercegovina bila primljena u Vijeće Evrope, gdje bi sva pitanja rješavali zajedno.

Predsjedavajući Avdić se duboko zahvalio Lordu, naglasivši da je on uvijek bio dokazani prijatelj Bosne i Hercegovine i uvijek na strani građana i naroda BiH. Potom je dao kraću pauzu kojom prilikom je lord Rassel Johnston napustio sjednicu Doma.

Poslije pauze predsjedavajući je konstatovao da sjednici prisustvuje 41 poslanik. Zatim je obrazložio prijedlog dnevnog reda i upoznao Dom o sugestijama da se s dnevnog reda skine tačka 7. - Izvještaj o izvršenoj reviziji godišnjih računa Ministarstva vanjskih poslova, Ministarstva civilnih poslova i komunikacija i Ministarstva vanjske trgovine i ekonomskih odnosa. Također je upoznao Dom da je i Prošireni kolegij neposredno pred sjednicu razmatrao prijedlog dnevnog reda i da nije postignuta saglasnost o skidanju sporne tačke.

U diskusiji povodom prijedloga dnevnog reda učestvovali su: Nedžad Šašivarević, Mirko Banja, Boro Bjelobrk, Željko Bilbija, Miro Grabovac - Titan i Ramiz Vilić.

Poslije diskusije predsjedavajući je dao na glasanje prijedlog Komisije za finansije i budžet da se s dnevnog reda skine tačka 7.

Sa 25 galsova ZA, 10 protiv i 5 suzdržanih, prijedlog Komisije je usvojen.

Potom je predsjedavajući konstatovao da je za 12. sjednicu usvojen sljedeći

D N E V N I R E D:

1. Usvajanje Zapisnika sa 11. sjednice Predstavničkog doma,
2. Konstituisanje Vijeća ministara Bosne i Hercegovine:
 - a) odobrenje imenovanja predsjedavajućeg Vijeća ministara,
 - b) odobrenje imenovanja ministara i zamjenika ministara;
3. Izvještaj Komisije Kolegija o nastojanju za postizanje saglasnosti o amandmanima na Prijedlog zakona o izmjenama i dopunama Zakona o izbjeglicama iz BiH i raseljenim osobama u BiH,
4. Prijedlog zakona o međudržavnom i međuentitetskom drumskom prevozu (prvo čitanje)
5. Izvještaj o izvršenju Budžeta institucija Bosne i Hercegovine i međunarodnih obaveza BiH za 2000. godinu,
6. Izvještaj o izvršenju Budžeta institucija BiH i međunarodnih obaveza BiH za period januar-mart 2001. godine,
7. Davanje saglasnosti za ratifikaciju:
 - a) Sporazuma o uspostavljanju međudržavnog savjeta za saradnju između Bosne i Hercegovine i Savezne Republike Jugoslavije i
 - b) Sporazuma između Vijeća ministara BiH i Vlade Republike Hrvatske o saradnji u zaštiti od prirodnih i civilizacijskih katastrofa;
8. Poslanička pitanja i odgovori.

Ad - 1: Usvajanje Zapisnika sa 11. sjednice Doma

Zapisnik sa 11. sjednice Doma usvojen je jednoglasno, bez diskusije.

Ad - 2: Konstituisanje Vijeća ministara Bosne i Hercegovine:

- a) Odobrenje imenovanja predsjedavajućeg,**
- b) Odonbrenje imenovanja ministara i zamjenika ministara**

Predsjedavajući Sead Avdić pročitao je Odluku Predsjedništva Bosne i Hercegovine o imenovanju dr Zlatka Lagumdžije za predsjedavajućeg Vijeća ministara. Potom je dao riječ predsjedavajućem Lagumdžiji da podnese svoj politički program.

Predsjedavajući Vijeća ministara dr Zlatko Lagumdžija na početku svog izlaganja zahvalio se poslanicima na podršci i saradnji u ime Vijeća ministara koje je prije nepunih pet mjeseci preuzelo dužnost pod predsjedavanjem akademika Božidara Matića. Rekao je da se

Vijeće ministara u ovom teškom vremenu teških promjena koje su se dešavale u regionu suočavalo sa dramatičnim društvenim izazovima i sa sve većom ekonomskom krizom. Potom je iznio presjek aktivnosti Vijeća ministara u prethodnih pet mjeseci, te naglasio da to što su postigli nisu rezultati koje su priželjkivali, ali su oni otvorili proces promjena jer su vidljivo povećali efikasnost rada Vijeća ministara, za što zasluga pripada svim članovima Vijeća ministara, a posebno gospodinu Matiću koji je unio potpuno novi stil rada, rekao je, pored ostalog, gospodin Lagumdžija govoreći o radu Vijeća ministara pod predsjedavanjem Božidara Matića.

Govoreći o svom programu gospodin Lagumdžija je rekao da izlaganje dr Matića koje je na početku mandata 22. februara 2001. godine iznio, poslanici smatraju priloženi njegovom izlaganju, jer je g. Matić u njemu definisao glavne pravce podizanja kompetentnosti zemlje i oni će biti neosporni dio kontinuiteta koji Vijeće ministara želi nastaviti. Zatim je govorio o potrebi donošenja Izbornog zakona; o realizaciji inicijative Predsjedništva BiH za jasno definisanje i razjašnjavanje nadležnosti institucija BiH i entiteta, kao i uzajamnih odnosa državnih institucija na nivou Bosne i Hercegovine i boljoj saradnji sa entitetskim vladama; o potrebi promjene u ponašanju i unutrašnjoj organizaciji i harmonizaciji državnih institucija na svim nivoima u skladu s Ustavom; izgradnje regulatornih agencija; donošenja Zakona o državnoj službi. Napomenuje da je Vijeće ministara već prezentiralo globalni okvir strategije ekonomskog razvoja BiH, te da su strategija borbe protiv siromaštva, program borbe protiv korupcije i uklanjanja barijera za investitore, Izvještaj i prijedlog mjera za povećanje konkurentne sposobnosti BiH - samo su neki od dokumenata koje su zajedno s entitetskim premijerima nedavno prezentirali javnosti i međunarodnim institucijama, rekao je, pored ostalog, Zlatko Lagumdžija i naglasio da oni predstavljaju osnovni pravac kojim se svi zajedno moramo kretati što brže. Istakao je da se svi moramo okupiti oko zajedničke vizije i sistema vrijednosti jedne normalne evropske zemlje.

Među prioritete koje će Vijeće ministara ponuditi Parlamentu Lagumdžija je naveo:

- aktivnosti na programu izgradnje koridora VC, koji sobom nosi političke i društvene integracije, ubrzanje privrednog rasta, otvaranje novih radnih mjesta, podsticanje trgovine i turizma, spajanje kultura i zajednica, jačanje regionalne stabilnosti i saradnje;
- saradnja sa sudom u Hagu,
- povratak izbjeglica;
- ujednačavanje imovinskih zakona;
- borbu protiv korupcije i organizovanog kriminala; odnos s međunarodnom zajednicom - od objekta moramo postati vlasnik promjena i proći kroz fazu u kojoj smo partneri sa međunarodnom zajednicom.

Predsjedavajući Vijeća ministara naglasio je da u svojim aktivnostima ni on niti bilo ko ne može uspjeti bez jasne i nedvosmislene podrške Parlamenta. Izrazio je uvjerenje da svi zajedno - i mi i stranci koji nam pomažu, imamo isti cilj, da se njihova uloga kontinuirano smanjuje i da mi što prije postanemo ti koji sami vodimo promjene, kako bi izgradili samoodržive institucije i samoodrživu ekonomiju Bosne i Hercegovine, rekao je, pored ostalog, Zlatko Lagumdžija izlažući svoj politički program pred Predstavničkim dom.

U diskusiji povodom tačke 2.a) učestvovali su:

Muhamed Begović - iznio stav Kluba poslanika Stranke za BiH da podržava Odluku Predsjedništva Bosne i Hercegovine o imenovanju Zlatka Lagumdžije i ocjenu tog kluba da je ovo imenovanje "pravi pogodak".

Branislav Lolić - obavijestio Dom da je Galvni odbor Srpskog narodnog saveza razmatrao dnevni red sjednice i da je jednoglasno odlučio da podrži kandidaturu Zlatka Laagumdžije za predsjedavajućeg Vijeća ministara.

Ivo Lozančić - iznio stav Klub NHI-SPBiH-BPS da podržava kandidovanje Zlatka Lagumdžije za predsjedavajućeg Vijeća ministara.

Miro Grabovac - Titan - prigovorio je što sjednici ne prisustvuje g-din Božidar Matić da Domu objasni zašto je podnio ostavku, pogotovu što je g-din Lagumdžija rekao da nastavlja kontinuitet Programa Božidara Matića, koji je, kako je rekao, bio neuspješan. U vezi s izlaganjem Zlatka Lagumdžije, pored ostalog, rekao je da iz izlaganja nisu saznali koga će predložiti u Vijeće ministara i hoće li ti ljudi izvesti Bosnu i Hercegovinu iz krize. Iznio je svoje mišljenje da je situacija jasna i da bi se morala postaviti nova strategija i Vijeća i njegovih ministara. Zbog ovih razloga, a i zbog jedne vrlo bitne činjenice koja se tiče poštivanja volje hrvatskog naroda, s obzirom da je HDZ dobila plebiscitarnu podršku unutar hrvatskog korpusa, a sa njom niko nije razgovarao u vezi s participacijom u izvršnoj vlasti, Klub HDZ-a neće podržati Odluku Predsjedništva BiH. Istakao je da nema ništa protiv lično Lagumdžije, ali smatra da Alijansa očito ne uvažava volju jednog od nosilaca suvereniteta u Bosni i Hercegovini, tj hrvatskog naroda, rekao je, pored ostalog, Miro Grabovac.

Bogić Bogićević - Podrška Kluba SDP-a imenovanju dr Zlatka Lagumdžije se podrazumijeva, što shvataju i kao priznanje i čast SDP-u, ali i obavezu i odgovornost za BiH i efikasnost institucija vlasti u BiH, rekao je, pored ostalog Bogić Bogićević.

Adem Borić - Klub poslanika SDA u ovom domu jeste za funkcionisanje Vijeća ministara, kao izvršnog organa vlasti u punom kapacitetu. Bosna i Hercegovina je u tranziciji i njeni građani i narodi zbog opšte poznatih prilika i stanja u zemlji traže najbolje kadrove koji će otvoriti perspektivu usprkos tome što danas imamo, rekao je, pored ostalog, Adem Borić. Potom je izrazio žaljenje što ni Lagumdžija, jednako kao ni Matić, nije našao za potrebno da se konsultuje sa predstavnicima stranke koja je nijača opoziciona stranka u Parlamentu po broju poslanika. Tu gestu smatraju, najblaže rečeno, neprimjerenom, rekao je g. Borić, izrazivši bojazan od voluntarizma koji se na ovom prostoru znao izvitoperiti u nešto što ne želi ni reći, naglasio je Adem Borić i obavijestio Dom da zbog toga Klub poslanika Stranke demokratske akcije neće dati podršku predsjedavajućem niti Minsitarskom vijeću.

Mirko Banjac - Prigovorio je na početku što je program predsjedavajućeg Vijeća ministara tek dostavljen na stolove poslanicima i rekao da je neprihvatljivo da se od poslanika traži učešće u raspravi o jednom izuzetno važnom pitanju, a da se nema više od 10 minuta vremena za pripremu. Govoreći o programu koji je podnio Zlatko Lagumdžija, a koji je na brzinu uspio i pogledati, Banjac je, pored ostalog, rekao da taj program ni u kom slučaju ne može predstavljati ekonomski već politički program, sa dosta poruka. Prigovorio je na stavljanje u prioritete realizaciju inicijative Predsjedništva za jasno definisanje nadležnosti institucija i naglasio da su nadležnosti Ustavom jasno definisane. Također je prigovorio na poruku o internoj reorganizaciji, za promjenu statusa Vijeća ministara, da umjesto Vijeća bude Vlada; na pravnu nadgradnju umjesto da se kaže dosljedno i korektno kretanje u pravnim okvirima koje su dali Dejtonski mirovni sporazum i Ustav Bosne i Hercegovine. Naglasio je da Ustav ne podrazumijeva promjenu nego primjenu. Dalje je, pored ostalog, rekao da je on danas očekivao, uvažavajući ličnost i obrazovanje novog predsjedavajućeg, da će poslanici dobiti posve operativna programska načela iz kojih će se vidjeti ono što je obećano i u programu Matića, "te s obzirom da smo i ranije imali takve poruke, nisam zadovoljan jer želio sam da vidim posve jasno šta će g-din Lagumdžija s Kabinetom koga će predložiti, konkretno uraditi".

Željko Bilbija - obavijestio je Dom da će Klub poslanika PDP-SNS-SNSD/DSP-SPRS podržati g-dina Lagumdžiju i svoje članove koji su u Vijeću ministara. Rekao je, pored ostalog, da mi ovdje imamo dosta problema, ali nakon mnogo pregovora i dogovora ipak se dođe do određenih rješenja.

Dalje su u diskusiji učestvovali: Abdurahman Malkić, Boro Bjelobrk, Ibrahim Đedović, Ljubomir Kovačević, Osman Brka, Marko Amidžić, Mirko Baković, Hilmo Neimarlija, Zoran Spasojević, Sead Buturović i Salih Kulenović.

Poslije diskusije poslanika riječ je uzeo kandidat za predsjedavajućeg Vijeća ministara Zlatko Lagumdžija. On se zahvalio svima koji su dali veliki broj jako korisnih sugestija. Također se zahvalio svima koji su njemu lično dali podršku i onima koji su se unaprijed izjasnili da neće glasati za njega kao mandatar. Rekao je da misli da je to korektan odnos i zahvalio im se što su

to rekli za govornicom. Međutim, naglasio je da on tu nije kao privatno lice, nego je on tu zato što je on odraz jedne političke volje, jednog političkog koncepta, jednog političkog saveza koji smatra da ima parlamentarnu većinu i ponudio je jedan program. Svako odvajanje njega od ljudi i od čitavog projekta je nepotrebno, te da nema nikakve razlike između njega i ljudi koje će predložiti u onome zbog čega oni koji jesu zajedno - zbog političkog programa promjena o kojima ne treba posebno govoriti, rekao je, pored ostalog, g-din Lagumdžija.

Odgovarajući na određene primjedbe u diskusiji, pored ostalog, g-din Lagumdžija je odgovorio:

- U svom političkom obraćanju više puta se pozvao na Ustav i napomenuo da sve ono što radi i što svi zajedno rade želi da poštuje Ustav koji je takav kakav je, čak i ako im se ne dopada, a postoji način kako se Ustav dograđuje i poboljšava;
- Masa zakona ima koji ne postoje i to se podrazumijeva pod riječju **dogradnja**, koja treba biti u skladu sa Ustavom, i ne žele ništa drugo nego da u skladu sa Ustavom izgrađuju, dograđuju i jačaju pravni osnov koji će Bosnu i Hercegovinu definisati kao evropsku zemlju;
- Tačno je da se nisam konsultovao s SDA, HDZ i SDS-om kad je u pitanju sastav Vijeća ministara. To nismo radili ni prošli puta zato što je savršeno jasno da su oni na jednoj strani i da je i javnosti poznato da politička opcija kojoj pripadaju želi da u izvršnoj vlasti treba da budu bez pripadnika političkih stranaka koje su simbol vladanja ovom zemljom u prethodnom periodu.

Odgovarajući na direktno pitanje o partnerstvu za mir dr Lagumdžija je naglasio da će Vijeće ministara učiniti ono što je u njegovoj nadležnosti, ali da ih ustavni okvir obavezuje da postoje druge institucije. Sve što sam govorio u izlaganju usmjereno je na to da pokušamo što je moguće više koordinirati uzajamni rad institucija, jer ne postoji ni jedna institucija u BiH ni na nivou Entiteta koja može bilo kakve ozbiljne pomake učiniti sama, i to je ono što smatramo da nam je nedostajalo i za što je potrebna politička volja, rekao je, pored ostalog kandidat za predsjedavajućeg Vijeća ministara BiH Zlatko Lagumdžija, odgovarajući na diskusije povodom njegovog političkog programa.

Poslije izlaganja kandidata za predsjedavajućeg Vijeća ministara BiH, predsjedavajući Doma dr Sead Avdić dao je na glasanje odobrenje imenovanja predsjedavajućeg.

ZA odobrenje glasaala su 22 poslanika, PROTIV je glasalo 12, suzdržalo se 6. Glasajući po entitetima, iz Republike Srpske ZA je glasalo 7, a iz Federacije BiH 15 poslanika.

Predsjedavajući Avdić je konstatovao da je Predstavnički dom odobrio imenovanje dr Zlatka Lagumdžije za predsjedavajućeg Vijeća ministara i uputio mu iskrene čestitke i želje za uspješan rad.

Ad 2-b) Odobrenje imenovanja ministara i zamjenika ministara

Predsjedavajući Vijeća ministara Zlatko Lagumdžija prvo se zahvalio Domu na povjerenju koje mu je ukazano, a potom iznio sastav Vijeća ministara.

U diskusiji su učestvovali: Abdurahman Malkić, Miro Grabovac - Titam, Damir Mašić, Boro Bjelobrk, Mirko Baković, Mirko Banjac, Zlatko Lagumdžija i Mariofil Ljubić. Poslije diskusije obavljeno je glasanje o odobrenju imenovanja ministara i zamjenika ministara.

Sa 22 glasa ZA (prisustvovalo 40 poslanika) 13 PROTIV i 5 suzdržanih - po entitetima: iz Federacije BiH 15, iz RS 7, odobreno je imenovanje ministara i zamjenika ministara kako slijedi:

1. dr Zlatko Lagumdžija, za ministra vanjskih poslova,
2. dr Ante Domazet, za ministra za trezor institucija BiH,
3. dr Azra Hadžiahmetović, za ministra vanjske trgovine i ekonomskih odnosa,
4. Dragan Mikerević, za ministra za evropske integracije,
5. Krešimir Zubak, za ministra za ljudska prava i izbjeglice,

6. Svetožar Mihajlović, za ministra civilnih poslova i komunikacija,
 - Ivan Ivica Mišić i Milovan Blagojević - za zamjenike ministra vanjskih poslova,
 - Muharem Imamović i Gordana Ković - za zamjenike ministra za trezor institucija BiH,
 - Jadranko Prlić i Nikola Kragulj - za zamjenike ministra vanjske trgovine i ekonomskih odnosa,
 - Rasim Kadić i Zora Marijanović - za zamjenike ministra evropskih integracija,
 - Kadrija Haračić - Šabić i Vladislav Vladičić - za zamjenike ministra za ljudska prava i izbjeglice,
 - Jusuf Halilagić i Milan Lovrić - za zamjenike ministra civilnih poslova i komunikacija.

Ad - 3: Izvještaj Komisije Kolegija o nastojanju za postizanje saglasnosti o amandmanima na Prijedlog zakona o izmjenama i dopunama Zakona o izbjeglicama iz BiH i raseljenim

Predsjedavajući Avdić je podsjetio poslanike da Kolegij nije postigao saglasnost o amandmanima na Prijedlog zakona o izmjenama i dopunama Zakona o izbjeglicama iz BiH i raseljenim osobama u BiH, o čemu su poslanici dobili Izvještaj. Potom je obavljeno glasanje o amandmanima u drugom krugu.

Protiv amandmana glasale su dvije trećine poslanika iz Republike Srpske, te amandmani nisu usvojeni.

Potom je predsjedavajući dao na glasanje Prijedlog zakona.

Od 38 prisutnih poslanika u momentu glasanja, ZA Prijedlog zakona glasala su 23, protiv je glasalo 11, suzdržala se tri poslanika. Po entitetima, iz Republike Srpske ZA su glasala 3, iz Federacije BiH 21. poslanik. Predsjedavajući je konstatovao da Prijedlog zakona nije dobio entitetsku većinu, te da ide na usaglašavanje na nivou Kolegija Doma.

Poslije glasanja za riječ se javio predsjedavajući Komisije za ljudska prava, imigraciju, izbjeglice i azil, Osman Brka. On je izrazio nezadovoljstvo što nisu prihvaćeni amandmani Komisije, kao ni Prijedlog zakona. Istakao je da je Komisija u dva navrata razmatrala Prijedlog zakona i usvojila sporne amandmane koji bi, da su usvojeni mnogo značili za prognanike odnosno povratnike u BiH. Izrazio je čuđenje da za tako nešto nema političke volje i spremnosti da se učini napor da se obezbijedi potrošačka korpa kao minimum egzistencije povraatnika za šest mjeseci.

Ad - 4: Prijedlog zakona o međudržavnom i međuentitetskom drumskom prevozu (prvo čitanje)

Predsjedavajući Komisije za saobraćaj i komunikacije Ivo Lozančić obrazložio je Izvještaj Komisije o razmatranju Prijedloga zakona. Upoznao je Dom da su amandmane na prijedlog zakona podnijeli: Abdurahman Malkić - 31 amandman, od kojih je Komisija usvojila 18, te Klub poslanika PDP-SNS-SNSD/DSP-SPRS.

U diskusiji su učestvovali Abdurahman Malkić, Mirko Banjac i Željko Bilbija.

Abdurahman Malkić je ukratko skrenuo pažnju na amandmane koje je podnio na Prijedlog zakona, naglasivši da je želio približiti zakonska rješenja evropskim standardima. Istakao je da će on, pored amandmana koje je Komisija usvojila, insistirati na još barem 7-8 amandmana od preostalih koje je podnio.

Mirko Banjac je, pored ostalog, istakao da Prijedlog zakona daje rješenja kojim se ingerencije Entiteta žele prenijeti na nivo Bosne i Hercegovine, te da, dok se tekst ne usaglasi sa postojećom organizacijom Vlade RS i Vijeća ministara, Klub SDS neće moći glasati za predloženi zakon.

Ministar za civilne poslove i komunikacije, Svetozar Mihajlović, upoznao je Dom da je Prijedlog zakona usaglašen na radnoj grupi koja je bila sastavljena od predstavnika Entiteta. U ime predlagača izjasnio se da prihvata amandmane koje je usvojila nadležna komisija.

Željko Bilbija upoznao je Dom da i njegov klub ima amandmane na Prijedlog zakona. Naglasio je da nije siugran da su predložena najbolja rješenja, te da je neophodno izvršiti harmonizaciju propisa iz ove oblasti na nivou Entiteta s obzirom da u vladama Entiteta postoje minsitarstva za saobraćaj i kmuniakcije.

Predsjedavajući Doma Sead Avdić je podsjetio poslanike da se radi o prvom čitanju u kojem se ocjenjuju osnovne postavke i principi. Naglasio je da je zakon nužno donijeti na nivou BiH, koji će uvažavati decentralizaciju vlasti i odnos između države i Entiteta. Zatim je dao na glasanje Prijedlog zakona u prvom čitanju.

ZA Prijedlog zakona glasalo je 26 poslanika - iz Federacije BiH 23, iz RS 3. Prema tome, Prijedlog nije dobio entitetsku većinu.

Poslije izvjesnih poslovnčkih intervencija zaključeno je da se Prijedlog zakona pokuša usaglasiti na Komisiji Kolegija, te da se da' mogućnost za razmatranje na narednoj sjednici Doma.

Ad - 5: Izvještaj o izvršenju Budžeta institucija BiH i međunarodnih obaveza BiH za 2000. godinu

Predsjedavajući Komisije za budžet i finansije Nedžad Šašivarević podnio je Izvještaj te komisije o razmatranju Izvještaja. Naglasio je da je Komisija konstatovala da je bilo nepravilnosti po osnovu izvršenja Budžeta, te je usvojen stav da se Domu predloži da Izvještaj usvoji s prijedlogom zaključaka koje je Komisija usvojila.

U diskusiji su učestvovali Mirko Mijatović, Ramiz Vilić, Sead Avdić, Tihomir Gligorić i Ljubomir Kovačević.

Poslije diskusije predsjedavajući je prvo na glasanje dao stav Komisije za budžet i finansije, da se usvoji Izvještaj o izvršenju Budžeta s zaključcima koje je usvojila Komisija.

Od 36 prisutnih ZA stav Komisije glasalo je 17, PROTIV je glasao 14, a četiri poslanika su bila suzdržana. Glasajući po entitetima, iz Republike Srpske ZA su glasala tri poslanika. Prema tome, stav Komisije nije dobio entitetsku većinu.

Zatim se Dom izjasnio o prijedlogu koji je u ime Kluba poslanika podnio Tihomir Gligorić . da se Izvještaj primi k znanju, a da se sačeka kompletan Izvještaj Ureda za reviziju poslovanja institucija BiH koji će obuhvatiti sve institucije.

ZA prijedlog je glasalo 19, protiv 11, suzdržala se 3 poslanika. Prijedlog je dobio i entitetsku većinu.

Predsjedavajući Avdić je konstatovao da je Izvještaj o izvršenju Budžeta institucija BiH i međunarodnih obaveza BiH za 2000. godinu primljen k znanju i da će, nakon podnošenja cjelovitog Izvještaja Ureda za reviziju Izvještaj biti cjelovito sagledan zajedno sa Izvještajem Komisije za budžet i finansije.

Ad - 6: Izvještaj o izvršenju Budžeta institucija BiH i međunarodnih obaveza BiH za period januar-mart 2001. godine,

Nedžad Šašivarević podnio je Izvještaj Komisije za finansije i budžet o razmatranju Izvještaja.

Sa 30 glasova ZA i dva suzdržana Dom je usvojio ovaj Izvještaj.

Ad - 7: Davanje saglasnosti za ratifikaciju:

- a) Sporazuma o uspostavljanju međudržavnog savjeta za saradnju između Bosne i Hercegovine i Savezne Republike Jugoslavije i
- b) Sporazuma između Vijeća ministara BiH i Vlade Republike Hrvatske o saradnji u zaštiti od prirodnih i civilizacijskih katastrofa;

Dom je jednoglasno dao saglasnost za ratifikaciju razmatranih sporazuma.

Ad - 8: Poslanička pitanja i odgovori

Poslanička pitanja su postavili:

Osman Brka:

1. Zašto rukovodstvo Parlamenta nije bilo prisutno na sjednici 10. ovog mjeseca, a znamo kakva je sjednica bila?
2. Zašto delegacija ovog parlamenta nije mogla da bude u Potočarima? Zašto bar pojedincima nije omogućeno da odu u Potočare?

Muhamed Begović:

Da li je Vlada Jugoslavije ratifikovala Dejtonski mirovni sporazum ili nije?

Ponovo je postavio pet pitanja koje je postavio na 8. sjednici Doma, a na ista nije dobio odgovor.

Željko Bilbija:

Prekidom radova u Iraku ,1990. godine prilikom invazije Iraka na Kuvajt Ujedinjene nacije su Rezolucijom 692 odobrile naknadu štete GIK "Hidrogradnja" Sarajevo u iznosu od 91,648.780,00 USA dolara. "Hidrogradnja" u Federaciji BiH je već dobila cca 46,000.000,00 USA dolara, a "Hidrogradnja" Srpsko Sarajevo nije ni obaviještena o realizaciji pomenute odštete. S obzirom da su prije rata bili jedinstveno preduzeće smatra da bi odštetu trebala dobiti i "Hidrogradnja" sa sjedištem u Republici Srpskoj. Od Vijeća ministara zatražio uputstvo za ostvarivanje ovih legitimnih potraživanja.

Nedžad Šašivarević:

Zatražio da mu se dostavi Izvještaj o primanju zaposlenih u Službi Parlamenta za zadnja tri mjeseca.

Ljubomir Kovačević.

1. Postavio pitanje novom Vijeću ministara, koje je postavio i ranije, a nije dobio odgovor: Šta će Vijeće ministara uraditi na poboljšanju životnog standarda radnih ljudi i građana BiH.

Miloš Jovanović:

Rekao da nema ništa protiv da je parlamentarna delegacija prisustvovala komemoraciji u Potočarima, ali postavio pitanje - da li je takva delegacija trebala prisustvovati i komemoraciji u Kravicama 12. jula.

Mustafa Cuplov:

Da li je formirana komisija za očuvanje nacionalnih spomenika i ako nije, hoće li biti formirana.

Senad Šarganović:

1. Kada će biti formirana komisija parlamenta za kontrolu oružanih snaga, koja će biti u funkciji stvaranja inicijative za formiranje zajedničke vojske?
2. Kada će biti formirana komisija Parlamenta za kontrolu MUP-a, odnosno za formiranje jedinstvenog MUP-a, u granicama Ustava BiH.

Abduahman Malkić:

Zatražio da Vijeće ministara, odnosno Minsitarstvo za ljudska prava i izbjeglice pokrene aktivnosti i koordinira sa Vladom RS na izmještanju kamp-kućica koje je svojevremeno u Srebrenici pravila Švedska prognanim Srebreničanima, a u njima su sada srpske izbjeglice i te kuće su na privatnim imanjima koje bi vlasnici htjeli da obrađuju.

Sjednica je rad završila u 19,00 sati.

Sastavni dio ovog zapisnika je magnetogram 12. sjednice Doma.

SEKRETAR
PREDSTAVNIČKOG DOMA
Branka Todorović

PREDSJEDAVAJUĆI
PREDSTAVNIČKOG DOMA
dr. Sead Avdić